


# Ўзбекистон ва Жанубий Корея раҳбарлари юқори технологик шерикликни янада ривожлантиришга умид билдириди



13-15 июнь кунлари Корея Республикаси Президентининг Ўзбекистонга илк ташрифи амалга оширилди. Жанубий Корея раҳбарининг ташриф дастури ниҳоятда мазмунли бўлиб, олий даражадаги музокаралар, Тошкент Технопаркига ташриф ва қўшма бизнес-форумда иштирок этишини ўз ичига олди.

Кенг кўламли учрашувлар кун тартибидан Ўзбекистон ва Корея ўртасида юқори технологиялар соҳасидаги ҳамкорликни ривожлантириш масаласи ҳам жой олди.

Таъкидлаш керакки, хозирги вақтга қадар мамлакатларимиз ушбу йўналишда муваффақиятли ўзаро ҳамкорликни йўлга қўйиб олди.

Юн Сок Ёль таъкидлаганидек, икки мамлакат ўртасида автомобилсозликдан бошланган ҳамкорлик бугунги кунда барча соҳалар, жумладан, IT ва инфратузилмалар соҳасини қамраб олди.

Бугунги кунга келиб, Жанубий Корея билан ҳамкорликда Ўзбекистонда қўшма ўқувтадқиқот тўқимачилик технопарки, Нодир металл ва қотишмалар илмий-технологик маркази, Қишлоқ хўжалик машинасозлиги конструкторлик-технологик маркази, Ўзбекистон-Корея Электрон ҳукумати ва рақамли иқтисодиёт ҳамкорлик маркази ташкил этилди.

Бундан ташқари, Корея Республикаси мамлакатимизда Миллий электрон савдо платформасини ишга туширишда ёрдам кўрсатди.

Шу муносабат билан мавжуд салоҳиятдан тўлақонли фойдаланиш мақсадида олий даражали музокаралар давомида Ўзбекистон раҳбари томонидан келгуси 3 йилга мўлжалланган алоҳида Ўзбекистон ва Корея ҳамкорлигининг янги юқори технологияларга оид кун тартибини шакллантириш муҳимлиги таъкидланди.

Бу электроника, IT-соҳа, робототехника ва биотехнологиялар каби юқори технологиялар соҳасида жаҳондаги илғор мамлакатлардан бири ҳисобланган Жанубий Корея билан ҳамкорликни янада мустаҳкамлаш ва ошириш имконини беради.

Корея Республикаси Глобал инновацион индекс (*Global Innovation Index*)нинг **топ-10 талигига** киради, бунинг устига, сўнгги ўн йиллик (213-2022 йй.) давомида у **18-ўриндан 6-ўринга** кўтарилди.

Бундан ташқари, сўнгги **10** йил ичидаги патент-аризалар сони **42,5 фоизга** ошиди, бу эса Кореяning уларнинг умумий сони (**267 минг**) бўйича Хитой, АҚШ, Япониядан кейин **4-ўринни** эгаллашига имкон яратди.

Шу билан бирга, Сеул биотехнологиялар соҳасини ҳам жадал ривожлантирумоқда. Масалан, Кореяning мазкур соҳадаги йиллик ишлаб чиқариш хажми **2020** йилдаёқ **42 триллион** вон (**30 миллиард доллар**) дан ошиб кетди. Бу кўрсаткични **2035** йилгача **5** баробарга (**148 миллиард долларгача**) ошириш мақсад қилинган.

Шу маънода икки давлат ҳукуматларига Ўзбекистонда минтақавий юқори технологиялар хабини яратиш бўйича Стратегия дастурини ишлаб чиқиш, унда ўта муҳим минерал ресурслар, ярим ўтказгичлар, кимё саноати, машинасозлик, “ақлли” қишлоқ хўжалиги, шаҳарсозлик ва энергетика технологиялари трансфери соҳаларини энг муҳим йўналишлар сифатида белгилаш вазифаси юклатилди.

Мазкур қадам Президент Шавкат Мирзиёев томонидан асосий устувор вазифа сифатида кўрсатилган инновацион ва юқори технологик ривожланишга йўналтирилган стратегиянинг мантиқий давомидир. Уни амалга ошириш республикамиз иқитисодиётини технологик жиҳатдан модернизация қилиш ва глобал бозорда унинг рақобатбардошлигини оширишни жадаллаштиришга ёрдам беради.

Бундан ташқари, Юн Сок Ёль музокаралар жараёнида, шунингдек, бизнес-форумдаги чиқишида давлатларимиз ўртасида нодир ер ости ресурслари, ярим ўтказгичлар, технологик сектор ва инсон капиталини ривожлантириш соҳаларида ҳали ишга солинмаган улкан салоҳият мавжудлигини бир неча бор қайд этди. Бу каби эътиборли жиҳатларни ҳисобга олиш Корея Республикасининг Ўзбекистон билан юқори технологиялар соҳасидаги шерикликни мустаҳкамлашдан манфаатдор эканлигини намойиш этади.

Шу тариқа, Корея раҳбарининг Ўзбекистонга ташрифи якунлари икки мамлакат раҳбариятининг муносабатларни, айниқса, илғор технологиялар соҳасидаги алоқаларни янада кенгайтиришга содиқлигини намойиш этади. Ўз навбатида, ташриф доирасида эришилган келишувлар Ўзбекистон ва Корея Республикаларининг технологиялар соҳасидаги ҳамкорлигига янги улкан қадамлар учун муҳим пойdevор бўлади.

**Тимур Курбанкличев,**  
**Ўзбекистон Республикаси Президенти ҳузуридаги СМТИ етакчи илмий ходими**